

Headline	Baiki segera rumah Orang Asli Sg. Ruil		
MediaTitle	Utusan Malaysia		
Date	07 Mar 2024	Language	Malay
Circulation	107,609	Readership	322,827
Section	Dlm Negeri	Page No	34
ArticleSize	371 cm <sup>2</sup>	Journalist	NORHAFIZAN
PR Value	RM 45,687		



AL-SULTAN Abdullah Riayatuddin Al-Mustafa Billah Shah berkenan meninjau cerun runtuh di penempatan Orang Asli Sungai Ruil, Tanah Rata, Cameron Highlands. - UTUSAN/MUHAMAD NAZREEN SYAH MUSTHAFA

# Baiki segera rumah Orang Asli Sg. Ruil

Oleh NORHAFIZAN ZULKIFLI  
 utusannews@mediamulia.com.my

**CAMERON HIGHLANDS:** Sultan Pahang, Al-Sultan Abdullah Riayatuddin Al-Mustafa Billah Shah bertitah agar 16 buah rumah masyarakat Orang Asli di Sungai Ruil, Tanah Rata dekat sini yang terjejas akibat kejadian tanah runtuh pada 12 Oktober tahun lalu segera dibaik pulih.

Titah baginda, pembaikan menelan kos RM3.5 juta perlu disegekan supaya 17 keluarga terbabit dapat kembali ke rumah asal mereka.

“Saya harap dapat kita cepatkan lagi usaha untuk memperbaiki penempatan ini supaya mereka boleh balik ke rumah asal mereka,

“Tapi dalam pada itu, kita harap JKR (Jabatan Kerja Raya) atau pihak yang membaiki ini dapat buat sebaik mungkin. Tidak mahu adanya lagi kejadian cerun runtuh secara mengikut begini,” titah baginda ketika berkenan mencemar duli melawat Kampung Orang Asli Sungai Ruil di sini, semalam.

Baginda dalam masa sama turut bertitah agar pihak terlibat tidak hanya membaik pulih cerun di perkampungan itu, tetapi juga cerun-cerun lain yang terdapat di daerah ini.

“Saya juga harap dan maklum di Cameron Highlands ini selalu berlaku tanah runtuh pada musim tengkujuh.

“Saya harap cerun-cerun lain juga perlu diambil kira untuk keselamatan pengguna jalan

raya,” titahnya.

Seramai 88 mangsa daripada 17 keluarga yang terjejas akibat tanah runtuh pada 12 Oktober tahun lalu diarah mengosongkan rumah masing-masing dan ditempatkan di Dewan Kampung Orang Asli Sungai Ruil.

Pada Februari lalu, kesemua mereka ditempatkan secara sementara di kuarters Tenaga Nasional Berhad (TNB) pada kadar sewa RM500 sebulan seunit yang ditanggung sepenuhnya Jabatan Kemajuan Orang Asli.

TNB mengecualikan bayaran deposit sewaan selama tiga bulan dan penduduk akan tinggal sementara di kuarters itu selama dua tahun sehingga pembaikan cerun dan rumah terjejas selesai.